

TUMIEZ

***RIMIS E PENSADINIS***

***IN TUMIEZZÌN***

*di*

*Federico Morocutti*

\*\*\*

I SENTIMENTZ

\*\*\*\*\*

*Fin al d' di v'uei*

# I SENTIMENTZ

## **Indice**

A brazzeto

Amôr di copie

Chel cjan...

Inamorât

Un pâri

31 di Mai dal 2009 - Mame

Ridint

Ritrat

## *A brazzeto*

*Ce biel lâ a brazzeto!*

*A si cjamine insieme  
e al pâr lâ incuintri al mont  
sicûrs da compagnie.*

*Ce biel scoltâsi, capisi, tai voi cjalasi  
e di un vincûl di amôr unîz sintîsi.*

## *Amôr di còpie*

*Ta copie l'amôr,*

*esal 'zontâ dos strezzis,  
di ideài, sentimentz e passions?*

*Dut par dâ amôr  
e a la vite daigj plui valôr.*

*Chel cjan...*

*Chel dì in mont d'estât  
un cjan a nus à baiât.*

*Par cori a tor, daûr nus è vegnût  
chel cjan di cjazze scognossût,*

*di malghe in malghe davant  
e daûr nus à corût.*

*Cuant che i mi sei fermât  
indaûr lui 'l è tornât,*

*e cui vôi a mi à clamât,  
che i mi sei cuasi ingropât,*

*par chel cjan di cjazze scognossût,  
che la mê compagnie al à volût.*

*Inamorât*

*Cuant che i tu seis cun me*

*dut a si impie.*

## *Un pâri*

*Tu seis un pâri  
un pâri dai tiei timps.*

*Un pâri che al vîf ta int e tal lavôr  
e in famê al cjacare di justizie e di onôr.*

*Un pâri di chei “cui gnièrs da cope”,  
un che al à gnièrf e no peleote.*

*Un pâri atènt a la sô famê:  
pront a sorprendi il frut cun cualchi bièl scherzùt;*

*pront a poâ la sô manone sul cerneli dal frutùt,  
cuànt che a i pâr un pôc flapùt.*

*Un pâri che al conte di so pâri e di so mâri, dai fradis  
e dai amîs, da profuganze, da guere e dai timps antîcs.*

*A son storis impastadis di ironie,  
tant che a scoltalis a ven di ridi e no malinconie.*

*Tu seis propit un pâri, par me un riferimènt,  
une compagnè, un amôr sicûr;*

*pâri par simpri tû,  
tu seis gno pâri.*

*31 di Mai dal 2009*

*Mame*

*Frute e fêmine di sestìn  
serene tu as vivût il to destìn.*

*Lêgre di spìrit e inteligjenze  
tai tiei valôrs cun slàncio e diligjenze.*

*Cussì a ti ricuarde cui che a ti à cognossùde  
e la tô famê che a ti à gjoldùde.*



## *Ridint*

*Une bocje ch'a rît  
coragjo a ti po' dâ,*

*ma a son i vôi ch'a ridin  
che il cûr a ti san scjaldâ.*

## *Ritràt*

*La cjavelade a è mote  
e lis ondis altis la musute legre  
a van a incornisâ.*

*I smursielùz rotònz a curisìn i avrùz  
e se i voglons a vegin a calati,  
a podin come nue incantesemati.*